

Memoria xustificativa do convenio de colaboración entre a Consellería de Emprego, Comercio e Emigración da Xunta de Galicia e o Centro Ourensán de Montevideo para adaptar a sede e comprar equipamento coa finalidade de albergar nela á asociación de empresarios galegos do Uruguai

Á Consellería de Emprego, Comercio e Emigración correspóndelle, entre outras, a competencia das relacións e o apoio as persoas e ás comunidades galegas do exterior así como o fomento e a promoción da súa actividade e funcionamento, tal e como se recolle no artigo 1.c) do Decreto 147/2024, do 20 de maio, polo que se establece a súa estrutura orgánica.

A súa vez, o artigo 49 do antedito decreto determina que a Secretaría Xeral da Emigración é o órgano superior da Administración xeral da Comunidade Autónoma de Galicia ao que lle corresponden as competencias en materia de emigración e retorno e, entre outras, as relacións e o apoio ás persoas e ás comunidades galegas no exterior, así como o fomento e a promoción da súa actividade e funcionamento, as competencias recollidas na Lei 7/2013, do 13 de xuño, da galegitude, e as atribuídas á comunidade autónoma na Lei 40/2006, do 14 de decembro, do estatuto da cidadanía española no exterior, en particular, as que melloren o benestar social e a calidade de vida da cidadanía galega no exterior.

A Secretaría Xeral da Emigración xestiona diversos programas tendentes á mellora da calidade de vida das persoas galegas residentes fóra de Galicia que executa a través da estrutura das entidades galegas do exterior, polo que procura contribuír á conservación, fomento e promoción do seu patrimonio.

Así, a Consellería de Emprego, Comercio e Emigración ten previsto formalizar co Centro Ourensán de Montevideo un convenio que ten por obxecto establecer o marco da colaboración entre as entidades asinantes para o acondicionamento de espazos e a compra de equipamentos para a sede social do Centro Ourensán de Montevideo, coa finalidade de albergar nela á Asociación de Empresarios Galegos do Uruguai.

A entidade Centro Ourensán de Montevideo ten como finalidade honrar a Galicia e fomentar o seu coñecemento, procurar o maior benestar da colectividade galega residente en Uruguai e promover e apoiar a cultura galega promovéndoa no ámbito nacional e internacional.

O Centro Ourensán de Montevideo ten a súa sede social na rúa Ana Monterroso de Lavallega N°2014, compartindo as instalacións con A Casa de Galicia Centro Histórico e Cultural, entidade herdeira da histórica Casa de Galicia, cun obxecto social análogo ao do Centro Ourensán, o que permitiu que ambas institucións se complementasen nas súas actividades e foran máis fortes economicamente.



Actualmente a Asociación de Empresarios Galegos do Uruguai manifestou tamén interese en compartir esta sede, o que supón unha ventá de oportunidade para os intereses da poboación galega residente no país, xa que permitiría a convivencia do ámbito asociativo e cultural co profesional e emprendedor e poder avanzar no cumprimento conxunto e coordinado de fins e obxectivos.

Para materializar este acordo, debe acometerse a reforma de espazos e comprar o equipamento que permita cubrir as necesidades das diferentes actividades das institucións que convivirán nestas instalacións.

A Consellería de Emprego, Comercio e Emigración considera que esta entidade é a institución idónea para o outorgamento desta axuda de carácter singular e excepcional, que non se enmarca dentro dunha actuación xeneralizada de axudas para este tipo de actividades, ao abeiro do disposto no artigo 19.4 c) da Lei 9/2007, do 13 de xuño, de subvencións de Galicia e non é posible promover a concorrència pública.

Debido ás circunstancias socio-económicas do país ao que se dirixe esta axuda, no que é habitual e legal realizar os pagamentos en efectivo con independencia da contía, resulta adecuado acollerse ás previsións do artigo 42.3 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de Subvencións de Galicia e permitir a xustificación do pagamento mediante recibín do provedor para gastos de escasa contía por importes inferiores a 1.000 euros.

Para dar cumprimento ao obxecto deste convenio, a Consellería de Emprego, Comercio e Emigración achegará unha contía de 21.432,17 €, con cargo á aplicación orzamentaria 14.05.312C.781.0 (código proxecto 2015 00039) dos orzamentos xerais da Comunidade Autónoma de Galicia para o ano 2025 na que existe crédito adecuado e suficiente.

Os intereses converxentes das partes asinantes exclúen o ánimo de lucro e non poden satisfacerse axeitadamente mediante a sinatura dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014; ou doutro instrumento alleo á natureza estritamente convencional.

Con atención no exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

Santiago de Compostela, na data da sinatura electrónica

O secretario xeral da Emigración

Antonio Rodríguez Miranda

